

藏書紀事詩

耐庵題籤

宋史李常字公擇建昌人少讀書廬山白石僧舍既擢第
畱所鈔書九千卷名舍曰李氏山房熙甯初爲祕閣校理
累遷禮部侍郎哲宗立進戶部尙書 蘇軾李氏山房藏

書記余友李公擇少時讀書於廬山五老峯下白石庵之
僧舍公擇旣去而山中之人思之指其所居爲李氏山房
藏書凡九千餘卷公擇旣已涉其流探其源采剝其華實
而咀嚼其膏味以爲已有發於文詞見於行事以聞名於
當世矣而書固自如也未嘗少損將以遺來者供其無窮
之求而各足其才分之所當得是以不藏於家而藏於其
故所居之僧舍此仁者之心也 揮麈錄承平時士大夫
家如南都戚氏歷陽沈氏廬山李氏九江陳氏鄱陽吳氏

俱有藏書之名今皆散佚 周密齊東野語藏書之富曾
南豐及李氏山房皆一二萬卷其後厄於兵火 陸游求
志居士彭君墓志銘廬陵太和有士曰彭君惟孝字孝求
力於學聚書萬餘卷號彭氏山房延老師宿儒主講說命
子姪執弟子禮惟謹

切雲高閣鬱嵯峨繞屋蒼松九里多豈是西來龍象力年來
總住病維摩

錢勰穆父

弟蘇岳仲

武林紀事宋錢蘇字岳仲居九里松建傑閣藏書甚富東
坡榜之曰錢氏書藏 蘇軾和錢四寄其弟蘇詩再見濤
頭湧玉輪煩君久駐浙江春年來總作維摩病堪笑東西
二老人施注錢四益穆父蘇字岳仲時穆父守越公守杭

故云東西二老人又注次韻錢穆父詩云穆父名勰吳越
讓王諸孫以蔭入官元祐初拜中書舍人哲宗蒞政入翰
林罷知池州以卒後追復龍圖閣學士昌熾案漁洋香祖
筆記歷數宋人藏書有錢穆父則是兄弟皆好藏書也

高臥林皋四十年綠蘋蘼靡桂連蜷青溪不與麻沙近空賦

淮南招隱篇

張墨子厚

宋璫

宋史隱逸傳張墨字子厚常州人登進士甲科調青溪主
簿不之官閉戶讀書四十年手校數萬卷無一字舛元祐
大臣薦起教授潁州辭不就孫覺胡宗愈范祖禹交章言
曰舉且死草萊後世必以爲朝廷失士蘇軾言之尤切詔
拜祕書省校書郎竟不出崇甯四年卒賜諡曰正素先生

歸

又列傳宋璿解褐青城主簿好寫書秩滿載數千卷以

花霧氤氲散綺窗山猿悲嘯谷泉淙主人被甲長征去不及

岐亭監酒巵

健爲王氏胡定之

蘇軾健爲王氏書樓詩樹木幽翠滿山谷樓觀突兀起江濱云是昔人藏書處磊落萬卷今生塵江邊日出紅霧散綺窗畫閣青氤氲山猿悲嘯谷泉響野鳥嘒憂巖花春借問主人今何在被甲遠戍長苦辛先登搏戰事斬級區區何者爲三墳書生古亦有戰陣葛巾羽扇揮三軍古人不見悲世俗回首蒼山空白雲養新錄蘇東坡在黃州有岐亭監酒胡定之載書萬卷隨行喜借人看見與秦太虛

書

誰爲篤耨與都梁蜀道歸來品異香但恨太倉稊米盡空櫓
飢雀噪無糧

沈立

宋史沈立初在蜀悉以公粟售書積卷數萬神宗問所藏
立上其目周紫芝書洪駒父香譜後厯陽沈諫議家昔
號藏書最多者今世所傳香譜蓋諫議公所自集也以爲
盡得諸家所載香事矣以今洪駒父所集觀之十分未得
其一二也簡明目錄香譜四卷宋陳敬撰集沈立以下
十一家香譜彙爲一書

鑑湖不住住橫塘梅子江南總斷腸一自渡江歸祕府小朝

兼取蔡元長

賀鑄方回曾收彥和

葉石林賀鑄傳賀方回名鑄衛州人自言唐諫議大夫知
章後故號鑑湖遺老長七尺眉目聳拔面鐵色博學彊記
工語言深婉麗密如次組繡尤長於度曲家藏書萬餘卷
手自校讎無一字脫誤所與交終始厚者惟信安程俱致
道 中吳紀聞賀方回本山陰人徙姑蘇之醋坊橋有小
築在盤門之南十餘里地名橫塘方回往來其間嘗作青
玉案調淩波不過橫塘路但目送芳塵去錦瑟華年誰與
度月橋仙館綺窗朱戶唯有春知處碧雲冉冉衡皋暮綵
筆新題斷腸句試問閒愁知幾許一川煙草滿城風絮梅
子黃時雨山谷有詩云解道江南斷腸句只今惟有賀方
回其爲前輩推重如此 老學庵筆記方回貌奇醜俗謂

之賀鬼頭喜校書朱黃未嘗去手潘邠老贈方回詩云詩
束牛腰藏書豪書訛馬尾辨新讐有二子曰房曰廩於文
房從方廩從回蓋寓父字於二子名也 太平清話方回

居吳下昇平橋及橫塘別墅藏書萬餘卷 又云鏡湖本

慶湖也避漢安帝父清河王諱改爲鏡湖故賀方回自號
慶湖居士 蘇州府志企鴻軒在昇平橋賀鑄所居其親

題書籍云昇平地 建炎以來朝野雜記高宗渡江書籍

散失紹興初有言賀方回子孫鬻故書於道者上命有司
市之洪玉父爲少監言蕪湖僧有蔡京所寄書籍因取之

以實三館 野客叢書曰僕得毘陵賀方回家所藏繕寫

嵇康集十卷 天祿琳瑯呂氏春秋有鏡湖遺老識語云

此本得於東牟王氏四明使君于元豐初奉詔修書於資
善堂嘗取太清樓藏本爲之校定元祐壬申余喜得此書
校讎始就爲一客挾去後三年見歸因募筆工錄之 昌
熾案香祖筆記稱宋人藏書曾攷彥和賀鑄方回宋史藝
文志曾攷等尙書義三十卷困學紀聞曾攷字彥和爲書
解朱文公呂成公皆取之館閣書目書講義博士曾肢等
解蓋誤以攷爲肢

早登元祐諸賢籍晚作征南誠子書盡取九經東高閣潁川
士子是前車 趙令時德麟

簡明目錄侯鯖錄宋趙令時撰令時晚節頽唐而早年坐
與蘇軾游入元祐黨籍所往還酬唱皆一代勝流故目染

耳濡典型終在 又德隅齋畫品一卷宋李廌撰記趙令
時家諸畫凡二十二種各爲敘述品題 甯宋樓藏書志
侯鯖錄宋聊復翁趙德麟撰盧紹弓手跋曰德麟宋宗室
名令時太祖子燕懿王德昭之五世孫與蘇子瞻同官潁
川故其所交多一時名士後從高宗南渡襲封安定郡王
紹興四年薨 德隅齋畫品自序趙德麟藏書數萬卷蓄
書數十函皆留京邸 侯鯖錄比來士大夫借人之書不
錄不讀不還便爲已有又欲使人之無本潁川一士子九
經各有數十部皆有題記是爲借諸人不還者每炫本多
余未嘗不戒兒曹也

第四坊迷養素園滄洲雞犬亦仙源井公未必無賢裔息壤

何緣竟食言

井度憲孟

晁公武子止

鮑慎由欽止

金

困學紀聞攷之東京記宣德門前天街東第四昭德坊晁

文元公宅致政後闢小園號養素翁元圻注晁迴諡文元

著昭德新編二卷直齋書錄解題昭德新編晁迴撰昭

德者京師居第坊名也晁氏子孫皆以爲稱又昭德易

詁訓傳十八卷敷文閣直學士清豐晁公武子止撰晁氏

居京師昭德坊故號昭德晁家沖之叔用其父也又晁

氏讀書志二十卷晁公武撰袁本讀書志杜鵬舉序鵬

舉作邑峨下望先生滄洲之居雞犬相聞暇卽問奇字於

古松流水之間郡齋讀書志序公武家自文元公來以

翰墨爲業者七世故家多書至於是正之功世無與讓焉

然自中原無事時已有火厄及兵戈之後尺素不存也南陽公天資好書自知興元府至領四川轉運使常以俸之半傳錄時巴蜀獨不被兵人間多有異本聞之未嘗不力求必得而後已歷二十年所有甚富既罷載以舟卽廬山之下居焉宿與公武厚一日貽書曰某老且死有平生所藏書甚祕惜之願子孫稚弱不自樹立若其心愛名則爲貴者所奪若其心好利則爲富者所售恐不能保也今舉以付子他日其間有好學者歸焉不然則子自取之公武惕然從其命書凡五十篋合吾家舊藏除其複重得二萬四千五百卷有奇今三榮僻左少事日夕躬以朱黃讎校舛誤終篇輒撮其大旨論之書則固自若也倘遇其子孫

之賢者當如約紹興二十一年元日 暴書雜記衢本讀

書志序但稱南陽公不著其姓陳氏書錄解題謂南陽公
未知何人或云井度憲孟也則所見讀書志亦衢本也袁
本序文作南陽井公趙氏希弁後志序明言井晁二家晁
氏於宋書條下云嘉祐中以宋齊梁陳魏北齊周書詔館
職讎校政和中畢頒之學官民間傳者尙少未幾遭靖康
丙午之亂中原淪陷此書幾亡紹興十四年井憲孟爲四
川漕始檄諸州學官求當日所頒本時四川五十餘州皆
不被兵書頗有在者然往往亡闕不全收合補綴獨少後
魏書十許卷最後得宇文季蒙家本偶有所少者於是七
史遂全因命眉山刊行焉讀此知井公收刊史籍之功亦

甚鉅也 昌熾案周紫芝太倉稊米集有書譙郡先生文

集後云余頃得柯山集十卷於大梁羅仲共家已而又得張龍閣集三十卷於內相汪彥章家已而又得張右史集七十卷於浙西漕臺而先生之製作於是備矣今又得譙郡先生集一百卷於四川轉運副使南陽井公之子晦之然後知先生之詩文爲最多猶有網羅之所未盡焉晦之泣爲余言百卷之書皆先君無恙時貽書交舊而得之手自校讎爲之是正凡一千八百三首歷數年而後成君能哀其所未得者以補其遺是先君子之志也觀此文則井公有子且能讀父書矣公武何未聞還輒也甚矣踐言之難也又案讀書志呂夏卿兵志三卷公武得之於宇文時

中季蒙題其後云夏卿戒其子弟勿妄傳鮑欽止吏部好藏書苦求得之因借錄於吳興之山齋季蒙卽藏後魏書者欽止名慎由括蒼人元祐初以任子試吏部銓第一復登六年進士乙科甫脫選卽爲郎然自是數坐累官竟不進撰夷白堂小集二十卷別集三卷見直齋書錄解題
警記宇文虛中爲人媒孽指家藏圖書爲反具罪至族高士談圖書尤多亦見殺士大夫家藏圖籍固是美事然聚書之禍不可不知

維宋元祐年月日具官臣某瀆天威竄金可析書休析伏乞朝廷降指揮

濡須秦氏

直齋書錄解題秦氏書目一卷濡須秦氏元祐二年有爲

金部員外郎者聞於朝請以宅舍及文籍不許子孫分割
昌熾案今世風俗衰薄祖父遺書子孫攘奪往往各私局
鑰不容互觀鉅冊不能分者甚至各據其半其後卒不能
爲延津之合良可慨歎秦氏此舉法良意美實爲藏書者
百世之師獨惜其名字翳如爲可悼也

平生不識新經義眾勢時風豈所趨煮餅燒蔥誰約我寫書
今日破工夫

魏衍昌世

陳師道朝奉郎魏君墓誌銘君諱璫字仁卿其先自魏徙
彭城有子曰衍君產萬金委羣弟不問人有難之者君不
答召衍而指其書曰讀此不患貧矣 又招黃魏二生詩
魏詩黃筆今未有顧我獨得神所鍾徑須相就踏泥潦已

辨煮餅燒油蔥 卻埽編陳無已詩惟魏衍所編二十卷
最善衍字昌世彭城人無已高弟也自以不能爲王氏學
不事舉業家貧甚未嘗以爲戚惟以經籍自娛名所居之
處曰曲肱軒自號曲肱居士政和間余兄弟從其學時年
五十餘見異書猶手自鈔寫故其家雖貧而藏亦數千卷
叩扉欲訪龐居士月夜扁舟過鹿門良紙善工我自樂儼然
身到小桃源 蔡致君

蘇過夷門蔡氏藏書目序比游京師有爲余言吾里有蔡
致君隱居以求志好古而博雅閉門讀書不交當世之公
卿類有道者也余矍然異之一日造其門見其子從容請
交焉其子爲余言吾世大梁人業爲儒吾祖吾父皆不事